



Ilaqutariinnermut Peqqissutsimullu Ataatsimiititaliaq
Inatsisartut

Inuit innarluutillit tapersorsorneqarnissaannut inatsisissatut siunnersuut UPA 2019-205 pillugu apeqqutit

24-04-2019
Suliap normua 2018 - 8048
Akt. id. 10563497

Aallaqqaasiutigalugu inuit innarluutillit tapersorsorneqarnissaannut Inatsisartut
inatsisissaattut siunnersuut pillugu apeqqutit nassiuunneqarsimasut pillugit
ataatsimiititaliaq qujaffigerusuppara.

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: ian@nanoq.gl
www.naalakkersuisut.gl

Inuit innarluutillit tapersorsorneqarnissaannut Inatsisartut inatsisissaattut siunnersuut
UPA2019/205 aqutugalugu inunnut innarluutilinnut suliassaqarfimmi najoqutassat
nutaat eqqunneqarput. Inuit innarluutillit innarluuteqarnertik kisiat naapertorlugu
isiginiarneqarunnaartussaapput, kisianni innarluuteqarneq inuit innarluutillit ataasiakkaat
inuiaqatigiillu naapeqatigiinneranni aporfittut isiginiarneqassalluni.

Inuup innarluutaata avatangiisimimi aporfinnik naapitsineranik pilersarnera taamaalilluni
siunnersuutit nassataraa. Tamanna aammattaaq isumaqarpoq killiliineq inummi
pisinnaasakillisisamasumiittuusariaqanngitsaq – killiliinerli inuiaqatigiit
avatangiisigineqartut inuit assigiinngitsuunerat eqqarsaatigalugu
aaqqissuunneqarsimannginnerannik pissuteqarsinnaalluni.

Assersuutaasinnaasoq unaavoq inuk niuusaqarnini uummalluttuuninilu pissutigalugit
piginnaanikillisisamasoq. Inuup qaqqajunnap qaavani illoqarneranut naleqqiullugu, inuk
illumu inissiamiluunniit tikikkuminartumi najugaqarsimappat, taava inuup ulluinnarni
inuunermini piginnaanikitsuuneq pingaartippallaassanngilaa.
Inuk suliffimminut suliffiminillu, aamma niuertarfinnut niuertarfinniillu
pisuttariaqarneranut naleqqiullugu busserluni ingerlanneqarsinnaanera
piginnaanikillisisamaneranut pingaaruteqarpallaassanngilaa. Kisianni inuk
assersuutigalugu peqqissaasuuppat, piginnaanikillisisanera inuup ulluinnarni
inuuneranut pingaarutilimmik akimmiffinnik kinguneqassaaq, tamannalu inuit innarluutillit
tapersorsorneqarnissaannut inatsit malillugu tapersorsorneqarnissamik
pisariaqartitsissaaq.

Tassa inuup piginnaanikillisisanera taamaalilluni assigiinngitsorujussuarnik
kinguneqartarpoq, apeqqutaaginnarpoq inummut pissutsit avatigineqartut qanoq
ittuunersut. Pissutsit taakku inuup tapersorsorneqarnissaata nalilersorneqarnerani
ilaatinneqassapput.

Siunnersuummi atatitsisutut ilaasoq alla unaavoq, inuup innarluutillip tapersiissummut
pisinnaasaanut aalajangersimasumik inummullu ataasiakkaamut tunngassuteqartumik

iliiusissanut pilersaarusiortoqartussaammat. Inuup innarluutillip taassumunngalu pissutsit aalajangersimasut aallaavigalugit nalilersuineq taanna pissaaq.

Tassunga atatillugu inuup pisariaqartitai, nukissai aamma ajornartorsiutai, piviusumik aallaavigalugit tamakkiisumik nalilersuisoqassaaq. Tamakkiisumik nalilersuinissaq isumaqarpoq, oqartussaasoq aamma inummut innarluutilimuinnaq tunngaassuteqanngitsunut isummersussasoq. Tamakkua assersuutigalugu tassaasinnaapput isumaginninnermi ajornartorsiutit, inuup ilinniagaqarneq suna ingerlanneraa imaluunniit aallartissallugu kissaatiginneraa, inuup suliffissaqarnikkut inissisimanera kiisalu periarfissai aammalu peqqissutsikkut inissisimanera.

Taamaalliluni siunnersuutip inuk innarluutilik qitiusumiitippaa, tapersiisoqarnissanillu aalajangiinerit inuup aalajangersimasup pisariaqartitai, nukissai ajornartorsiutaalu aallaavigalugit aalajangerneqassallutik, matumani inuup piginnaanikillisisimanagera, avatangiisai aamma inuunermi atugai ilanngullugit. Taamaammat nappaatit aalajangersimasut innarluutitut nassuiarneqarsinnaanngillat. Tapersersorneqarnissamik pisariaqartitsinerit ataasiakkaarlugit nalilersorneqartarput.

Ataatsimiititaliap apeqqutit nassiuussimasai tulluuttuni akissavakka.

1) Inuit innarluutillit tapersersorneqarnissaat pillugu malittarisassani maanna atuuttuni malittarisassat ataani innuttaasoq qaqugukkut inissisimasut isumaqarfigineqassanersoq kommunalbestyrelsinit innuttaasut ataasiakkaat tapersersorneqarnissamik pisariaqartitaat aallaavigalugit assigiimmik naliliisarnerup attatiinnarneqarnissaa peqqinnissaqarfiup kommuninilu isumaginninnikkut oqartussaasut akornanni ataqatigiissitsinissaq qanoq qulakkeerniarneqarpa?

Akissut: Inuk innarluutilik ataqatigiissagaasumik, ataqatigiissumik tamakkiisumillu isiginnittumik, inummut tunngasut tamaasa aamma inuup inuunera mianeralugit, tapersersorneqarnissaminut pininnaatitaasoq siunnersuummi § 3-mi aalajangersarneqarpoq, inuullu pisariaqartitai, nukissai aamma ajornartorsiutai, piviusumik aallaavigalugit tamakkiisumik nalilersuinissannik kommunalbestyrelsit pisussaaffilerneqartut tamatuma kinguneraa, matumani inuup peqqissutsikkut inissisimanera ilanngullugu.

Inuk innarluutilik tapersersorneqarnissamik pisariaqartitsisoq ilimagineqarpat, taava siunnersuutip § 25-iata kommunalbestyrelsit pisussaaffilerpai qulaajaanermik suliaqaqqullugit. Aalajangersakkami kommunalbestyrelsit qulaajaanermut atatillugu nalilersugassaat pissutsit aalajangersimasut allattorneqarsimapput, matumani peqqissutsimut tunngasut ilanngullugit.

Qulaajaanerup imarisassaanut aalajangersimasunik piumasaqaateqarpoq, taamaalliluni inuup ajornartorsiutai nukissaalu pillugit tamakkiisumik isiginnilluni aaqqissuussaasumillu qulaajaanerup ingerlanneqarnissaa qulakkeerneqarniassammat. Siunnersuummi § 25 malillugu, qulaajaanermut atatillugu taamatuttaaq, inuup innarluutillip tapersersorneqarnissaanik aalajangiisoqannginnerani, iliiusissanut pilersaarummik allaganngorlugu kommunalbestyrelsit suliaqassapput. Iliiusissanut

pilersaarummik allaganngorlugu suliaqarnerup kommunalbestyrelsit aaqqissuussaasumik peqqissaartumillu inuup tapersersorneqarnissamik pisariaqartitaanik qulaajaanissaq qulakkiissavaa.

Qulaajaanerit iliuusissanullu pilersaarutit suliarineqarsimasut tunngavigalugit, kommunalbestyrelsit tapersiisoqassappat tapersiinissat aalajangiiffigissallugit pisussaaffigivaat.

Taamaalilluni qaqugukkut kommunalbestyrelsit qulaajaanermik iliuusissanullu pilersaarummik suliaqassanersut, qulaajaanerit iliuusissanullu pilersaarutit sunik imaqqassanersut kiisalu taakku suliarineqarneranni piumasaqaatit piumasarineqartut suut naammassineqartussaansut, siunnersuutip erseqqissumik malittarisassiuppai. Taamaalilluni kommunit assigijaaamik sullissinissaannut sinaakktissat siunnersuummi aalajangersarneqarput. Innuttaasoq aalajangersimasoq siunnersuummit tapersersorneqarsinnaansoq pillugu apeqqummi tamatigut pissutaatinneqassaaq inuit ataasiakkaarlugit aamma inuup pisinnaasakillisisanerata aallaqqaataanilu allaaserineqartut inuup ulluinnarni aporfigisartagaasa piviusorsioortumik nalilersorneqarnera.

2) Nappaat anniaalluunniit qanoq ilinikkut innarluutinnguuttarnersoq ataatsimut isigalugu oqaatigineqarsinnaava? Nappaatit anniaatillu akissuteqaammi ilaatinneqarsinnaasut ataatsimiititaliamit aallarniutigalugu oqaatigineqareerput.

Akissut: Naamik, nappaat qaqugukkut innarluutinngussanersoq nalinginnaasumik oqaatigineqarsinnaangilaq. Inuttut innarluutilittut immikkoortinneqannginnissaq, kisialli innarluutigineqartumut naleqqiullugu inummut unammilligassat tunngavigalugit sullinneqarnissaq inatsisip siunertaata annerpaartaraa. Taamaamat sukkortuuguit nakorsarneqarluarlutillu, taava inuttut innarluutilittut taaneqassanngilatit, kisianni suliffeqaruit isigisinnaanillu pisariaqarpat, sukkortuunerpillu kingunerisimappagu tappiillisimaneq, taava immaqqa ikiorsiissutinik tunineqartariaqassaatit imaluunniit allamik suliaqalerniassagavit nutaamik ilinniarnissannut ikiorneqassallutit.

3) Tapersiissutit akiliutigineqartartulluunniit ullumikkut peqqinnissaqarfimmit akiutigineqartartut oqartussaqaarfimmut allanut, assersuutigalugu siunnersuut una naapertorlugu, kommuninut nuunneqarneranik inatsisissatut siunnersuutip kingunerissavaa?

Akissut: Naamik, ullumikkut peqqinnissaqarfimmit ikiorsiissutit tunniunneqartartut allannngortinnissaanik siunnersuut kinguneqanngilaq.

4) Siunnersuutip matuma kingunerisaanik tapiissutit akiliutigineqartartullu peqqinnissaqarfimmit ullumikkut tunniunneqartartut allannngortinneqarnerannik siunnersuut kinguneqassava?

Akissut: Naamik.

5) Atuartut ullumikkut atuarfeqarfiup ataani akiliunneqartartut siunnersuummi matumani ilaatinneqartut tapersorsorneqarpat, tamannalu periaatsinik aningaasaqarnikkullu qanoq kinguneqassava?

Akissut: Naamik, tapersiissutit ullumikkut atuarfeqarfimmit tunniunneqartartut siunnersuutip atuutilersinneqarnerani suli atuarfeqarfimmit isumagineqartassapput.

6) Inunnut annertuumik innarluutilinnut tapiissutit pillugit malittarisassat atuuttunut tunngatillugu siunnersuut una sullinniakkat ilaatinneqarnissaat siunnersuummi § 6-imi oqaaseqaatini oqaatigineqarpoq. Malittarisassat atuuttut naapertorlugit inuit qassit ullumikkut ikiorneqartarpat aammalu siunnersuut manna naapertorlugit inuit qassit ataatsimut tapiissutinik pinissaat naatsorsuutigineqarpa malunnaatilimmillu allannguutit suuppat?

Akissut: Kommuninit nalunaarsuutit Naalackersuisut pisaat kingullit piffissami 2016-2017-imeersuupput. Taakku malillugit innuttaasut 1542-t innarluutillit ikiorserneqartarnerat pillugu peqqussummi ilaapput. Piffissami tassani innuttaasut ilaat ikiorsiissummik ikiorsiissutinilluunniit arlalinnik pisarsimapput, massa ilaat piffissami tassani ikiorsiissutinik pisarsimangitsut.

Siunnersuummi sullinniakkat amerlineqarput, taamaalilluni inuit inatsisit allat malillugit tapersorsorneqartartut aamma ilanngunneqarlutik, matumani pisortanit ikiorsiissutit aamma utoqqaliniarsiat ilanngullugit. Taamaattoq tamanna pillugu inuit qassit siunnersuummut massumunnga ilanngunneqassanersut naatsorsorneqarnissaannut periarfissiisumik kisitsisit atorlugit nassuiaasianik peqanngilaq.

7) Oqartussat akunnerminni aammalu oqartussat iluminni assersuutigalugulu kommunit akunnerminni attaveqatigiinnerup nukittorsarneqarnissaanik pisariaqartitsineq matumani ilanngullugu atuariit aamma peqqinnissaqarfiup isumaginnittoqarfiillu akunnerminni suleqatigiinnerat nukittorsarneqarnissaa pillugu siunnersuummik siullermeerinermi oqaluuserineqarpoq. Oqartussat taaneqartut digitalitigut sulianillu sullissinermi periutsinut paasissutissanillu avitseqatigiittarnermi suleqatigiinissaq siunnersuummilu matumani inunnut pineqartunut tunngatillugu attaveqatigiinnissamik piumasaqaateqarnissaq eqqortinneqassasoq Naalackersuisut isumaqarpat?

Akissut: Oqartussaasoqarfiit assigiinngitsut akornanni attaveqatigiinneq sunniivigeqatigiinnerlu ilitsersuut aqutigalugu qulakkeerneqassaaq. Inatsisip nutaap suleriaatsit eqaannerusut periarfississavai, matumani sullissinerup digitaliseeriinikkut (qarasaasiaq atorlugu sullissinikkut) ikorfartorneqarnissaa ilanngullugu.

8) Malittarisassat atuuttut naapertorlugit inuit qassit nammineq angerlarsimaffimminni najugaqarnersut Naalackersuisunit ilisimaneqarpa?

Akissut: Siunnersuummi sullinniakkat amerlineqarput, taamaalilluni inuit inatsisit allat malillugit tapersorsorneqartut aamma ilanngunneqarlutik, matumani pisortanit ikiorsiissutit pillugit aamma utoqqalinersiaqartitsisarnermut malittarisassat ilanngullugit. Taamaattoq tamanna pillugu, inuit namminneq angerlarsimaffimminni najugaqartut qassit siunnersuummut massumunnga ilanngunneqassanersut

naatsorsorneqarnissaannut periarfissiisumik kisitsisit atorlugit nassuiaasianik peqanngilaq.

9) Malittarisassat atuuttut naapertorlugit ukiumut piffissaq tamaat ikorfartortitut sulisut akissarsiallit qassiuppat, malittarisassallu akuerineqarnerisigut pineqartut amerlassusaat aningaasartuutillu attuumassuteqartut allannguuteqassappat?

Akissut: Tapersersortitut ikiortit kommuninit akissarsiaqartinneqarput. Piffissaliunneqartup iluani tapersersortitut ikiortit piffissaq tamaat sulisut qassiunersut pillugit Naalakkersuisut paasisutissanik kommuninit pissarsiniarnissaminnut periarfissaqarsimangillat.

Inatsisissatut siunnersuummut nutaamut atatillugit aningaasartuutit amerlinissaat naatsorsuutigineqanngilaq. Inatsisissatut siunnersuutip aningaasatigut kingunissai siunnersuummut nassuiaatini nalinginnaasuni immikkoortoq 3-mi takuneqarsinnaapput .

10) Inunnut ikorfartortinut sulisunullu allanut inunnik innarluutilinnik suliaqartunik pikkorissaanissaq ilinniartitseqqinnissarlu qanoq annertutigisumik pisariaqartinneqarpa, Namminersorlutillu Oqartussat kommunilluunniit ataanni sulisuugaluarpata inunnut tapersersortinut piumasaqaataasumik pikkorissarneqarnissaat piumasaqaataasumillu ilinniaqqinnissaat Naalakkersuisunit qanoq qulakkeerniarneqarpa?

Akissut: Tapersersortitut ikiortit pisariaqartinneqartorujussuupput aamma inunnut innarluutilinnut tapersersortitut ikiortinut Peqqissaanermik Ilinniarfik, Perorsaanermik Ilinniarfik aamma Pissassarfik pikkorissaanernik ilinniartitsinernernillu neqerooruteqartarput. Inunnut innarluutilinnut tapersersortitut ikiortinut ilinniartinneqarnissamik pikkorissarneqarnissamillu pisariaqartitsineq aammattaaq inatsisissatut siunnersuutip akuerineqareernerani atuutissaaq. Siunissami Peqqissaanermik Ilinniarfik, Perorsaanermik Ilinniarfik aamma Pissassarfik tassaassapput pikkorissaanernik ilinniartitsinernillu taakkuninnga neqerooruteqartassapput.

11) Siunnersuummut ilitsersuummik suliaqartoqarpa, tamatumalu saniatigut sullissisut pikkorissarneqarnissaat qulakkeerneqarpa, aamma ikiortit taperfsersortillu pikkorissartinneqartarpat?

Akissut: Inatsimmut nutaamut ilitsersuummik suliaqartoqassaaq meeqqallu tapersersorneqarnissaannut inatsisip atuutsinneqalernera assigalugu inatsit pillugu pikkorissaasoqarlunilu pikkorissartitsisoqassaaq. Aammattaaq apeqqummut 10-mut akissutigineqartut innersuussutigineqarput.

12) Pineqartumi Namminersorlutik Oqartussat kommunillu akornanni suleqatigiinneq ingerlanneqassava?

Akissut: Isumaginninnermi suliassaqarfimmi kommunit suliassaat unammilligassaallu pillugit kommunit Isumaginninnermullu Aqutsisoqarfiup akornanni ataavartumik oqaloqatigiinnerit ingerlanneqarput. Oqaloqatigiittarnerni taakkunani pikkorissartitsinernik ilinniartitseqqinnernillu pisariaqartitsineq ukkatarineqarpoq.

13) UPA 2014-imi aalajangiiffigisassatut siunnersuut una (UPA 2014/111) akuersissutigineqarpoq:

Nunatsinni innarluutilinnik sullissisuusut ilinniagaqarnissamut piginnaangorsarnissamullu pisariaqartitaat aallaavigalugit Naalackersuisut iliuusissamik suliassamullu piareersaasiamik innarluutilinnik sullissinermi piginnaangorsarnissamut pisariaqartitat tamakkiisumik pigilernissaannut tikkuussisunik UPA 2015-mut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

Periusissiaq pineqartoq suliarineqarpa? Taamaattoqarsimanngippat periusissiamik pineqartumik Naalackersuisut suliaqalersaarpat, sulisummi eqqarsaatigalugit periusissiamik peqarnissaat innarluuteqartunullu tunngasuni piginnaasaqarnissamut piumasaqaataasut qulakkeerpeqarsinnaaqqullugit, inuit timimikkut tarnimikkulluunniit innarluuutillit pisariaqartitaannik tapersersuinissamillu naammassinnissinnaaqqullugit?

Akissut: 2014-imi novemberimi Inatsisartunut qinersisoqarpoq, taamaammallu Naalackersuisut nutaat UPA2014/111-p akuersissutigineqarneranut pisussaaffeqanngillat.

Kisianni aalajangiussaq malitseqartinneqarpoq, tassami 2015-imut Aningaangasut Inatsimmi kontumi pingaarnermi 40.01.08, Ilinniartitaanermut tunngasuni immikkoortumut pilersaarummi takuneqarsinnaammat, "Konto pingaarnermut aningaasaliissutit qaffaataat pingaartumik isumaginninnerup iluani, tassunga ilanngullugu innarluutillit pillugit suliassa qarfiup iluanni ilinniartitaanermik piginnaangorsaqqiinnermillu suliniuteqarnerunissamut atorneqarnissaat siunniunneqarpoq..." Tamatuma kingorna, aningaasanut inatsimmi konto pingaarnermi 40.91.26-imi, Isumaginninnermut suliassa qarfiimmi ilinniartitaanikkut suliniutit, 16,2 mio. kr.-it immikkoortinneqarput. Meeqqat tapersersorneqarnissaannut inatsisip inuillu innarluutillit tapersersorneqarnissaanut inatsisissap siunertaasa piviusunngortinneqarnissaasa periarfissaqarnissaat aningaasaliissutit taakkua qulakkiissavaat.

14) Inuit sungiusaqqinneqarnissamik piginnaasanillu attassiinnarnissamik sungiusarnissamik pisariaqartitsisut, Pissassarfimmeereernermilu kommunini malitseqartitsineq qanoq Sisimiuni Inunnut Innarluutilinnut Sullissivik Nunamut Tamarmut Atuuttoq – Pissassarfik - aqqutigalugu qulakkeerpeqassava?

Akissut: Innuttaasut inunnut innarluutilinnut sullissivimmi ingerlatanik peqataasut tamarmik Pissassarfimmit killiffii pillugit nalunaarusiorfigineqartarput. Pissassarfimmit kommuninut angalasarnernut atatillugu innuttaasunut ataasiakkaanut kiisalu taakku ilaqutaannut malitseqartitsinissaq isumaqatigiissutigineqartassaaq.

15) Nuna tamakkerlugu Inunnut innarluutilinnut sullissivik – Pissassarfik innuttaasut pisariaqartitsisut eqqarsaatigalugit piginnaangorsaanissamut piginnaangorsaqqinnissaannullu kommuninit atorneqartarnissaa ataatsimiititaliamit naatsorsuutigineqarpoq. Tamanna tunngavigalugu sullissiviup siumut isigisumik kommuniniit atuisutut akiliuteqaratik ingerlaannarsinnaanera ataatsimiititaliamnit tunngavilersoruminaappoq. Pissutsinut pisunullu

kommuninut akiliuteqalersitsisinnaasumik nassuiaateqartoqarmissaa ataatsimiititaliamit naatsorsuutigineqarpoq.

Akissut: Pissassarfimmiinnissamut Aningaasanut Inatsimmi immikkoortitsisoqarsimatinnagu taamaallaat kommunit akiliuteqartarnissaannut inatsisitigut tunngavissaq atorneqartassaaq. Inatsisitigut tunngavik taanna maannakkuugallartillugu atorneqarnissaa pilersaarutigineqanngilaq.

Aningaasanut Inatsimmi konto pingaarnermi 30.13.17-imi missingersuutini ilanngussani tulliuuttut ima allassimapput:

Innuttaasut Sisimiuni innarluutilinnut sullissivimmuut angalanerannut aningaasartuutaat piffissami 2018-2020-mi matumani konto pingaarnermi aningaasalersorneqassapput.

16) Sungiusaqqinneq/inuummarissaatit. Sungiusaqqittarmut kommunit attasiinnarsinnaannginnerat amerlasuunit ilisimaneqarpoq. Sungiusaqqinneq ajornertik pissutigalugu inuit ilaat innarluuteqalernerannik kinguneqartarpoq. Kommunit susassaqrifiinut qanoq amerlatigisunik immikkut aningaasaliisoqartariaqarpa, innuttaasumullu innarluutilimmuut atugassanngortinneqassappat? Taamaaliornikkut assersuutigalugu kommuninit naapertuutinngitsumik sipaarniarfigineqartannginnissaat qulakkeerneqarsinnaammat.

Akissut: Inunnut innarluutilinnut isumaginninnermut aningaasaliissutit kommuninut tapiissutini ilaapput. Sungiusartitseqqinneq Peqqinnissaqarfiup suliassarivaa. Innuttaasoq pisinnaassutsimi aserfallatsaaliornissaanik imaluunniit ineriartortinnissaanik pisariaqartitsippat, taava innuttaasup Pissassarfimmi sungiusarneqarnissani kommunimut qinnutigisinnaavaa.

17) Inuit innarluutillit pingaartumillu annertuumik innarluutillit kinguaassiuutigut, timaasigut aningaasaqarnikkullu pinerlineqannginnissaannut pitsaanerpaamik illersorneqarneqassapput? Inunnik innarluutilinnik sullissisut, inersimasut meeqqalluunniit pineqaraluarpata, pineqaatissinneqarsimannginnermut aamma meeqqanit pinerlisimannginnermut uppersaammik piniartoqartarnissaa ataatsimiititaliamit kissaatigineqarpoq. Tamanna Naalackersuisut qulakkeerniarpaat, Agter Naalackersuisut at sikre dette og hvilken vægt tiltænkes en "plettest" straffeattest at skulle have?

Akissut: Inatsit tunngavigalugu nalunaarutissatut missingersuummi, maannakkorpiaq tusarniaanermut quppersakkamiittumi, pinerluuteqarsimannginnermik uppersaamat pisariaqarfiinilu meeqqamik pinerliisimannginnermik uppersaamat piniarneqartassasut aalajangersarneqarpoq, ukunani;

- *Najugaqarfissatut neqeroorutini atorfinitsinneqarnermi, imaappoq najugaqarfinni illersugaasuni, najugaqaratigiiffinni kiisalu ulloq unnuarlu neqeroorutini*
- *Illersortimik toqqaanermi*
- *Ingjallortimik atorfinitsitsinermi*

Tamatuma saniatigut atorfinitsitsisutut oqartussaasup tamatigut qinnuteqartoq pinerluuteqarsimannginnermik uppersaammik takutitseqqullugu piumasaqarfigissallugu periarfissarivaa.

Sulisup suliaminut atatillugu meeqqanik 15-it inorlugit ukioqartunik attaveqassappat, taamaallaat meeqqamik pinerliisimanginnermik uppersaataat piniarneqarsinnaavoq, tamanna pissutigalugu oqaasertaliunneqarpoq "pisariaqarfiinilu".

Atorfinitsitsisutut oqartussaasup piginnaaneqarfigaa pinerluuteqarsimanginnermik allagartaq "imaqarpat" qanoq oqimaalutarneqarnissaa pillugu aalajangiissalluni. Tassani atorfinitsitsisutut oqartussaasup inunnut ataasiakkaanut piviusumillu naliliinera apeqqutaassaaq. Eqqarsaatigineqarsinnaavoq inuk ukiut arlallit matuma siorna pisiniarfimmi tillinniarsimanini pissutigalugu eqqartuunneqarsimasoq, kisianni tamatuma ineqarfissatut neqeroorummi igaffimmi ikiortitut atorfinitsinneqarsinnaanginnissaa kingunerisariaqanngilaa.

Assinganik meeqqamik pinerliisimanginnermut uppersaatinik piumasaqaateqartussaataaneq pillugu inatsimmi inummik meeqqamik pinerliisimasumik atorfinitsitsisinnaaneq pillugu inerteqquteqanngilaq. Taamatuttaaq uani atorfinitsitsisutut oqartussaasup atorfinitsitsinissaaq, inunnut ataasiakkaanut piviusumillu naliliineq tunngavigalugu inaarutaasumik aalajangiiffigissavaa. Tamanna ilaatigut pisinnaataaffinnik piiaaffiginninnerit pillugit nunat tamalaat akornanni inatsisitigut tunngavinnut tunngavoq, taamaattullu eqqartuussiviit suliassarikkajuppaat.

18) Meeqqanik pinerliisimanginnerneq pillugu inatsit inunnut nammineersinnaajunnaartitaasimasunut, inunnullu ingerlalluarunnaarsimasunut il.il. peqataaqqilernissaannut atuutsinneqassava?

Akissut: Atorfinitsitsinermut atatillugu meeqqanik 15-it inorlugit ukiulinnik toqqaannaq suliaqartussanik inunnik atorfinitsitsinermut atatillugu, unioqquitsinerit aalajangersimasut pillugit, ingammik meeqqanik kinguaassiuutitigut atornerluisimanermut tunngassuteqartut pillugit, Pinerluuteqarsimasunik Qitiusumik Nalunaarsuiffimmit paasissutissanik aallersinnaaneq Meeqqanik pinerliisimanginnermut uppersaatinik piumasaqaateqartussaataaneq pillugu Inatsisartut inatsisaata siunertarivaa. Tamanna tunuliaqutaralugu inersimasunut nammineersinnaassusiiagaasimasunut imaluunniit inersimasunut pisinnaasakillimasunut inatsimmi ilanngussisoqarnissaa isumaliutersuutigineqanngilaq. Pinerluuteqarsimanginnermik uppersaatinik aallersinnaataaneq pillugu malittarisassat atorfinitsitsinernut taakkununga atuutissapput.

Inatsisartut inatsisaata akuersissutigineqarneranut atatillugu akissuteqaatiminni KANUKOKA assingusumik apeqquteqarpoq:
"Kisiannili KANUKOKA-p erseqqissaatigaa meeqqat saniatigut inooqataasut allat aammattaaq illersorneqarnissamik pisariaqartitsisut, tamatumani inersimasut eqqarsartaatsimikkut innarluutillit kiisalu inersimasut meeraanerminni annertuumik sumiginnagaasimanermik nalaataqarsimasut. Taamaattumik siunnersuutigineqarpoq inuit inunnik taamaattunik sullitaqartut toqqaannartumillu attuumassuteqartut aammattaaq siunnersuummi ilaatinneqassasut. Naak oqaaseqaammi siunnersuutigisaaq isumaqatiginaraluartoq taamaattoq siunnersuummut ilaatinneqarsinnaangilaq, tassami sulisut matumani pineqartut tassaammata inunnik 15-it sinnerlugit ukiulinnik toqqaannartumik attaveqartut. Tamatumunnga pissutaavoq Naalagaaffiup pinerlunnernik nalunaarsuinnermut nalunaarutaani 15-inik ukiulinnut killilimmik aalajangersaanera, taannalu Justistministeriaqarfimmit atortussanngortinneqarluni,

taamaammallu tassuuna meeqqanik pinerliisimanginnermut uppersaatiip pilersinneqarneranut tamanna tunngavigineqarpoq, tassa atorfinnut meeqqanik 15-t inorlugit ukiulinnut suliaqartunut atortinneqartussaalluni. Tamatumunnga atatillugu takuneqarsinnaavoq, meeqqanik pinerlussimanginnermut uppersaatiit meeqqat 15-t inorlugit ukiullit kinguaassiuutitigut pinerliisimanagerit nalunaarsorneqarnerannut attuumassuteqartinneqartoq.

KANUKOKA-p inunnut aalajangersimasunut tunngatillugu eqqartugaanut atatillugu pinerlussimanginnermut uppersaatiip atornissaa pisariaqarpoq.

Pinerlussimanginnermut uppersaammattut atatillugu aammattaaq inatsisinik unioqqutitsinerit allat soorlu assersuutigalu tillinniagerit imaluunniit nakuusernerit nalunaarsorneqartarput, tamannalu KANUKOKA-p eqqartugaanik inunnik sullissisussanut tunngatillugu atorneqarsinnaavoq.”

19) Siunnersuummi kapitali 15-imi nakkutilliineq maleruagassiivigineqarpoq. Inuit innarluuutillit siunnersuummi § 62 naapertorlugu najugaqarfissatut neqeroorutini najugaqartut kommuninit qanoq akulikitsigisumik nakkutilliivigineqartarnissaat Naalakkersuisunit eqqarsaatersuutigineqarpa?

Akissut: Siunnersuummi nakkutilliineq pillugu maleruagassat saniatigut, nakkutilliineq pillugu maleruagassat nalunaarusiornikkut aalajangersarneqassapput.

Isumaginninnermi suliaqarfimmi nakkutilliisarneq pillugu Namminersorlutik Oqartussat nalunaarutaanni aalajangersakkat nalunaarummi atuuttumi allannguutitut ilanngunneqarumaarput.

Inummut sammititamik ukiumut 2-riarluni nakkutilliisoqartarnissaa nalunaarummi inassutigineqassaaq.

20) Najugaqaqatigiiffinnut aamma najugaqarfinnut illersugaasunut tunngatillugu siunnersuummi § 63 naapertorlugu ingerlatsinnermut attuumassuteqartunik qanoq akulikitsigisumik nakkutilliinermik kommunit ingerlatsisarnissaat Naalakkersuisunit eqqarsaatigineqarpa?

Akissut: § 63 malillugu ingerlatsinnermut sammititamik nakkutilliisoqartarnissaa ukiumut 1-riarluni pisarnissaa eqqarsaatigineqarpoq. Imm. 19 malillugu tamanna nalunaarummi aalajangersaavigineqassaaq. § 63, imm. 1-imi oqaaseqaatit ajoraluartumik kukkusumik allassimasut ilisimatitsissutigineqassaaq, tassani allassimammat Nakkutilliinermik ingerlatsivik tassaasoq najugaqaqatigiiffinnut najugaqarfinnullu illersugaasunut ingerlatsinnermut sammititamik nakkutilliisussaaq. Tamanna eqqunngilaq. Nakkutilliineq tamanna kommunalbestyrelsinit ingerlanneqartussaavoq, tamannalu siunnersuummi takuneqarsinnaavoq.

21) Innarluutilinnut namminneq angerlarsimaffimmini najugaqartunut qanoq akulikitsigisumik kimillu nakkutigineqarnerat ingerlanneqassava aamma najoqqutassat suut malillugit nakkutilliineq pitsaassusilerneqasava, taamaalilluni pineqartut inuunermi atugaat pitsaassusaa, ineriartornerat atugarissaarnerallu qaffasinnerpaaffimminiissinnaaqqullugu?

Akissut: Inunnut namminerisaminnik najugaqartunut nakkutilliinissaq eqqarsaatigineqanngilaq.

22) Inuit innarluutillit inersimasut namminneq angerlarsimaffimminni najugaqartut, aneerussiartorlutik, inuunerisa ajunngitsumik ingerlanissaannut, ilaqaatasut aamma peeruinnerisigut kikkunnit pulaarneqartarpat?

Akissut: Siunnersuutip § 42-ia malillugu inummut innarluutilimmut timikkut, tarnikkut, inooqatigiinnilu ineriartornissaminut kiisalu ulluinnarni suliassaanik sularinninneranut tapersorsortitut ikiortimik tunisisoqarsinnaavoq, matumani angerlarsimaffiup avataani ilanngullugu.

23) Inuit innarluutillit angerlarsimaffimminni najugaqartut atornerluisunngunnginnissaat, piitsunngunnginnissaat, eqqiluutsuunissaannut tunngasunut nallinnartunngunnginnissaat, imminnut isumagisinnaannginnertik pissutiginnarlugu, kommuninit akisussaaffimmik puigunnginnissaat qanoq Naalakkersuisunit qaulakkeerniarneqarpa?

Akissut: Siunnersuummi § 64, imm. 2 malillugu siunnersuummi maleruagassat kommunalbestyrelsimit ingerlanneqarnerat tassungalu atasumik allaffissornerat Naalakkersuisut qitiusumik nakkutilliinermut ingerlatsiviannit pingaarnersiorlugit nakkutilliivigineqassapput. Aammattaaq imm. 19-i innersuussutigineqarpoq.

Siunnersuummi kapitali 9 malillugu inuk innarluutilik imminut isumagisinnaanngitsaq, najugaqarfissatut neqeroorummik najugaqarnissaanik neqeroorfigineqassaaq.

24) Siunnersuummi § 24 naapertorlugu kommunalbestyrelsiu illersortinik aaqqissuussinermik pilersitsissaaq. Nunatsinni illoqarfinni minnerusuni nunaqarfinnilu tamatuma ingerlanneqarnissaa, ilinniakkatigut qaffasissumik pitsaassuseqarnissaaq Naalakkersuisut kommunillu qanoq eqqasaatersuutigaat?

Akissut: Kommunalbestyrelsit ataasiakkaat illersuisoqarnermik aaqqissuussinermik pilersitsissasut siunnersuummi pisussaaffilerneqarput, taamaalilluni kommunip qinnuteqaammik suliaqarneranut atatillugu inuk innarluutilik tapersorsorneqarnissaanik neqeroorfigineqassalluni.

Inatsisit naapertorlugu nalunaarutissatut missingiummi massakkut tusarniaanermut quppersakkami tusarniutigineqartumi, kommunalbestyrelsit minnerpaamik illersuisunik 2-nik toqqaassasut, taakkulu kommunimi illoqarfinni eqqartuussiveqarfiusuni tamani inuit innarluutillit ikiortassagaat tassani aalajangersarneqarpoq.

Illersutut atorfinitsinneqassagaanni inuup isumaginninnermut- inunnullu innarluutilinnut suliassaqarfinnut ilisimasaqarluarlunilu misilittagaqarsimanissaa kiisalu Isumaginninnermut Aqutsisoqarfimmit illersuisunngornissamut pikkorissaaneq ingerlassimassagaa taamaallaat piumasaqaataavoq.

Taamaalilluni immikkut aalajangersimasumik ilinniagaqarsimanissaq piumasaqaatigineqanngilaq, taamaallaat inuup inuup isumaginninnermut- inunnullu innarluutilinnut suliassaqarfinnut ilisimasaqarluarlunilu misilittagaqarsimanissaa kiisalu Isumaginninnermut Aqutsisoqarfimmit illersuisunnngornissamut pikkorissaaneq ingerlassimassagaa piumasaqaataalluni, taakkulu illersuisut ataasiakkaat atorfirmik suliarinnissinnaanissaannut sakkussaqaartissavaat.

Ilinniartitaaneq piginnaangorsarneqarnerlu aqputigalugit pisariaqartinneqartumik sulianut ilisimanninneq annertoq taamaalillunilu illersuisut pisariaqartinneqartut atorfinitsinneqarnissaasa qulakkeerneqarnissaa taamaaliornikkut siunertarineqarpoq.

25) Innarluutillit ikiorsiissutinik pisariaqartitsinerat pillugu kommunalbestyrelsi sulinermi ilisimaanik pissarsiniartarnissaat Naalakkersuisunit qulakkeerniarneqarpa?

Akissut: Inuk innarluutilik tapersersorneqarnissamik pisariaqartitsisoq isumaqarfigineqarpat, siunnersuutip § 25-iata qulaajaanermik suliagaqqullugit kommunalbestyrelsit pisussaaffilerpai. Qulaajaanermut atatillugu pissut aalajangersimasut kommunalbestyrelsip nalilersuiffigissagai aalajangersakkami allatorneqarput. Taamaalilluni qulaajaanerup imarisassaanut aalajangersimasunik piumasaqaateqarpoq, taamaaliornikkut suliani ataasiakkaani suliamut tunngatillugu ilisimasassat pisariaqartut kommunalbestyrelsit pissarsiarissagaat qulakkeerneqassalluni.

Tamatuma saniatigut tapersersorneqarnissamut periarfissat pillugit sulianut ilisimasassat ilitsersorneqarnissarlu pillugit inunnullu innarluutilinnut sullissivimmut nunamut tamarmut atuuttumut kommunalbestyrelsit saaffiginnissinnaanerat siunnersuutip § 11-iani periarfissinneqarpoq. Taamaalilluni sukumiisumik qulaajaasoqassasoq aammalu tassunga pisariaqartinneqartumik tapersersorneqarnissamik periarfissaqarnissaq piumasaqaataavoq.

26) Nunatsinni illersuiseqarnermut aqqissuussinernik arlalinnik peqarpugut, assersuutigalugu meeqqanut suliassani, assersuutigalugu pineqaatissinneqarsimasunut il.il. toqqammavigisatut aqqissuussinernik assersuutigalugu akuttunngitsumik illersuiseqarnermik assigusunik aqqissuussisoqartarluni. Ataatsimut illersuisoqalersinnaaneranut ilusilersuisoqarsinnaanera immaqa eqqarsaatigineqarsinnaagaluarpoq, taamaalilluni qaffasissumik iliniagaqarsimanissaq qulakkeerneqarsagaluarpat'

Illersuiseqarnissamik aqqissuussinerup pisariaqartinneqartumik ilinniakkatigut qaffasissusillit attatiinnarneqarnissaat kommunini ataasiakkaani immaqa ajornakusoorsinnaanera, ataatsimullu illersuiseqalernissap siunniunneqarnissaa imaluunniit nuna tamakkerlugu illersuisunik/nakkutiginninnermik aqqissuussineq nunatsinnut piviusunik pissutsinullu tulluarsarluarsimasunik Naalakkersuisunit eqqasaatigineqarsimava?

Akissut: Isumaginninnermut suliassaqarfik kommuninut inissinneqarnikuunera pissutigalugu, siunnersuut manna malillugu inunnullu innarluutilinnut kiisalu Meeqqat tapersersorneqarnissaannut Inatsisartut inatsisaat malillugu kommunalbestyrelsit illersuisussanik assigiinnik toqqaasinnaanerat ajornaquteqanngilaq.

Suli inatsisinik atuutsitsinermut suliassaqarfik tiguneqarsimangimmat, massakkuugallartoq aaqqissuussinermut ataatsimoortumut eqqartuussaasimasunut toqqammavigisassat ilaatinneqarnissaat periarfissaanngilaq. Tamanna pillugu massakkuugallartoq nunamut tamarmut illersuisoqartitsinissamut/toqqammavissaqartitsinissamut aaqqissuussinissamik Naalackersuisut pilersaaruteqanngillat.

27) taamaalilluni aalajangersakkami allassimaneratuut ilinniarsimangitsunut SIK-p isumaqatigiissutaa naapertorlugu minnerpaaffiliilluni tiimimusiaqarnissamik kommunit pituttugaajunnaarnissaat siunertaralugu siunnersuummi § 40 Naalackersuisunit oqilisarniarneqarpa, taamaaliornikkut kommunit sulisunut pineqartunut aningaasarsianut atorfinitsitsinermilu atugassarititaasut tunngatillugu eqaannerusumik tapersersuisinnaanerat qulakkeerneqarsinnaaqullugu?

Akissut: Naamik, aalajangersakkami siunertarineqartoq tassarpiaavoq inummumut innarluutilimmumut isumassuinnermik suliaqartut pitsaasumik atorfinitsinneqarnerminni atugassaqartinneqarnissaasa qulakkeerneqarnissaa. Aalajangersakkami aallaaviusoq tassaavoq inuup siusinnerusukkut isertitarisimasai tunngavigalugit akissarsiaasa aalajangersarneqarnissaat, taamaalillunilu ilinniarsimangitsutut SIK-p isumaqatigiissutaa malillugu minnerpaamik akissarsialimmumut nalunaaquttamut akigititaq qaangerneqarsinnaalerluni. Siusinnerusukkut akissarsiarineqarsimasunut uppernarsaatiniq peqartoqartinnagu, SIK-p isumaqatigiissutaa malillugu ilinniagaqarsimangitsunut akissarsianut akunnermut akigititaq taamaallaat aalajangersakkami ilanngunneqarpoq, akissarsiat minnerpaaffissaat qulakkeerniarlugu.

28) Siunnersuummik siullermeerinermi inatsimmi matumani suliffissaqartitsiniarneq, inatsimmilu matumani inunnut innarluutilinnut suliffissaqartitsiniarneq aammalu ilinniarnissamik neqeroorutit pillugit maleruagassanik Suleqatigiissitsisut ujaruippat, soorluttaaq ineqarnermut tapiissutit pillugit inatsit eqaannerusoq amigaataasoq, taamaalilluni inuit innarluutillit suliffissaqartitsiniarnermi peqataasinnaanerata namminerlu inigisaminnik tigungminniinnarsinnaanerisa aporfeerunnissaa qulakkeerneqarnissaa Suleqatigiissitsisunit oqaatigineqartoq. Maleruagassiuunneqarnissaa imaluunniit naalackersuinikkut attuumassuteqartumik pilersitsisoqarnissaanik Naalackersuisut ingerlatsilersaartoqarpa?

Akissut: Suliffeqarfeqarfimmi neqeroorutit pineqartillugit suliassat suliffeqarfeqarfik pillugu inatsisit ataanni suliarineqassapput. Suliffeqarfeqarfimmi neqeroorutit kiisalu ilinniartitaanissamut neqeroorutit isumaginninnermut oqartussaasunit suliassaanngillat, kisiannili suliffeqarnermut ilinniartitaanermullu oqartussaasoqarfiit ataaniillutik. Ineqarnermut tapiissutit pillugit inatsisit atuuttut innuttaasumut tamanut atuupput, aamma innarluuteqaraluarunilluunniit.

29) Siunnersuummi § 55 naapertorlugu eeqqat innarluutillit inissinneqarsimasut ukiumut marloriarlutik tikeraarlutik angalanissaminnut periarfissaqarput.

Illoqarfigisami avataanut inissinneqarsimasut ukiui apeqqutaatinnagit, piginnaatitsissut tamanna inunnut innarluutilinnut tamanut tunniunneqassagaluarpat aningaasartuutit qanoq qaffasinnerutigissappat?

Akissut: Ullumikkut innuttaasut innarluutillit 18-it sinnerlugit ukiullit paaqqinniffimmiittut 100-it missaaniipput. Ilaat angerlarsimaffittut kommunerisaminni imaluunniit illoqarfigisaminni inissinneqarsimapput. Taamaattoq qassit illoqarfigisaminni imaluunniit illoqarfigisamik avataani inissinneqarsimanersut pillugit nalunaarsuutinik eqqortunik peqanngilaq.

Maleruagassat atuuttut malillugit innuttaasut innarluutillit 18-it sinnerlugit ukiullit namminerlu kommunerisap avataanut inissinneqarsimasut, ukiumut ataasiarlutik tikeraarsinnaanermut pisinnaatitaaffeqarput. Taamaattoq innuttaasoq innarluutilik ukiut 10-t sinnerlugit angerlarsimaffittut kommunerisami avataani inissinneqarsimappat, taava tikeraarluni angalasarnerit ukiut allortarlugit pisinnaatitaaffigivaa. Innuttaasut innarluutillit 50-it missaaniittut tikeraaqinnissamut periarfissaq atussagaat isumaqartoqarpat, taava paasigallakkat naapertorlugit angalanernut aningaasartuutit 1 mio. kr. -iussapput, najugaqarnissanut 0,5 mio.kr.-it kiisalu ingjallortaasunut aningaasarsiaritinneqartunut 0,5-1 mio. kr.-iullutik. Tikeraarluni angalanernut atatillugu ingjallortit ilaneqassappata, taava sulii tamanna aningaasartuutaanerussaaq.

30) Siunnersuummi kapitali 12-mi ullut unnuallu 9-t ullunut unnuanullu 14-inut sivitsorneqassappat aningaasartuutit qaffannerutigissappat?

Akissut: Ullunut unnuanullu 9-nut malittarisassaq ullunut unnuanullu 14-inut allannngortinneqassappat, ingjallortimut aamma immaqalu innuttaasumut innarluutilimmut najugaqarnernut aningaasartuuteqarnerunermik kinguneqassaaq, taanna ilaqqutami attaveqarfigisakkaminiluunniit akeqanngitsumik ineqarsinnaassanngippat. Tassunga ilaassaaq ingjallortimut/ingjallortinut ullunut 5-inut akissarsiat. Innuttaasut innarluutillit 30-it missaaniittut siviuserusumik angalanissamik periarfissamik atuinissaat naatsorsuutigineqarpoq. Najugaqarnermut aningaasartuutit 0,2 mio. kr.-iussasut aammalu akissarsiassanut aningaasartuutissat 0,2 mio. kr.-iussasut naatsorsuutigineqarpoq.

31) Angajoqaat ilaat innarluutilimmik meerallit illoqarfinnut naleqquttunik ulloq unnuarlu angerlarsimaffilinnut nuunnissartik toqqartarpaat, taamaaliornermikkut meeqqaminnut qaninnerulernissaminnut periarfissaqarsinnaajumallutik.

Tikeraarluni angalanissamut aaqqissuussinerup attatiinnerneqarnissaa periarfissaava, taamaalilluni meeqqap ukiui apeqqutaatinnagit angajoqqaavisalu ukiumut ataasiarlutik kommunimut qimataminnut tikeraarnissaminnut periarfissinneqarsinnaaniassammata, taamatut aaqqissuussisoqassappat qanoq annertutigisumik aningaasartuutaanerussava?

Akissut: Aaqqissuussinerumut taamaattumut aningaasartuutaanerussat qasserpiaassanersut naatsorsoruminaappoq, tassami meeqqat qassit angerlarsimaffittut kommunerisamik avataanut inissinneqarsimanersut, imaluunniit angajoqqaat qassit illoqarfinnut/kommunimut meeqqamik inissinneqarfigisaanut, nuussimanersut pillugu

nalunaarsuutiniq peqanngimmat. Annertuumik nalornisoornertaqartunik aningaasartuutaanerusussat 0,5 mio. kr.-it qaangernaviangikkaat isumaqartoqarpoq.

32(1) Illoqarfimmi meeqqap ilisaaffissaanut imaluunniit ilisaaffigissallugu pisinnaatitaafigisaanut angalanermut ilaqutaasut nooqataasimasut aningaasartuutiginerusaasa matussusersneqarnissaannut aaqqissuussinermut periarfissap siunnersuummi § 59-p attatiinnarneqarnissaanut qanoq aningaasartuuteqarnerunermik kinguneqassava?

Akissut: . Annertuumik nalornisoornertaqartunik aningaasartuutaanerusussat 0,5 mio. kr.-it qaangernaviangikkaat isumaqartoqarpoq.

32(2) Siunnersuummi qanigisat tapersersorneqarnissaat, qanigisat ilitsersuunneqarnissaat qanigisanillu katsorsaataasumik oqaloqateqartarnerit qanoq qulakkeerniarneqarpat?

Akissut: Inunnut innarluutilinnut qanigisaasut siunnersorneqarnissaannut ilitsersorneqarnissaannullu siunnersuutip § 37-iani kommunalbestyrelsit pisussaaffilerneqarput. Siunnersuineq ilitsersuinerlu taanna ilaatigut atortorissaarutit ikiuutaasut pillugit pisassaaq, kiisalu katsorsaataasunik oqaloqateqarnissanut neqerooruteqassalluni.

Inatsit malillugu nalunaarutissatut missingiummi, massakkut tusarniaanermut qppersakkamiittumi, inunnut innarluutilinnut qanigisaatut pikkorissarneqarnernut peqataanissaannut ilinniartinneqarnissannullu kommunalbestyrelsit neqerooruteqassasut aalajangersarneqarpoq, tamanna qanigisaasup tapersersorneqarnissaa aamma qanigisaasup piginnaasaasaa patajaallisarneqarnissaat siunertaralugu pissalluni.

Tassunga atatillugu qanigisaasoq Inuit innarluutillit tapersersorneqarnissaannut Inatsisartut inatsisaat malillugu imaluunniit inatsit alla malillugu ikiorserneqarnissamik pisariaqartitsinersut kommunalbestyrelsip eqqumaffigissavaa.

33) Siunnersuutip matuma sunniutaasa naliliivigineqarnissaat qanoq qaqugulu Naalakkersuisunit qulakkeerneqarnissaa pissava?

Akissut: Aaqqissuusseqqinnernik annertuumik naammassisaqartoqartillugu, malitseqartitsinissaq pisariaqarpoq. Inatsisissatut siunnersuummi maanissaaq tamanna pissaaq.

Upernaakkut ataatsimiinnermi matumani imm. 48-imut allannguutissatut siunnersuummik Naalakkersuisut saqqummiussissapput. Tassani siunnersuutigineqarpoq: Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaanni Kalaallit Nunaat eqquutsitsinersoq pillugu nassuiaammik kingusinnerpaamik UPA2023-mi Naalakkersuisut saqqummiussissasut. Eqquutsitsinissamat atatillugu siuariaatsit amigaatillu pillugit nassuiaat qulaajaassaaq. Inuit innarluutillit pillugit kommunit nalunaarusiaat suliffissaqartitsineq aamma ilinniartitaaneq pillugu nalunaarutinut kattutsinneqarnissaannut Naalakkersuisut piareersaataasumik suliaqaleruttorput. Taamaammat 2019-2020-ip ingerlaneranni inuit innarluutillit qanoq amerlatigisut

suliffeqarfeqarfimmiinnersut/suliffeqarfeqarfimmiinnginnersut pillugit kiisalu inuit innarluutillit akornanni ilinniarsimassutsip qanoq qaffasitsiginera pillugu nalunaarusiamik saqqummiussissallutik Naalakkersuisut naatsorsuutigaat.

Siunnersuummi § 64 malillugu Naalakkersuisut qitiusumik nakkutilliinermik ingerlatsiveqassapput. Inatsisartut inatsisaata massuma kommunalbestyrelsinit ingerlanneqarnera allaffissornikkullu ingerlanneqarnera pingaarnertut ilaatigut Nakkutilliinermik ingerlatsiviup suliarissavaa.

34) Ilaqutariit nukittuut aamma ikiortissarsiorsinnaanerat qanoq qulakkeerniarneqarpa? Ilaqutariit nukittuut inuillu allat ilaqutaasup innarluutillit sullinnerani ikiorneqarnissamik pisariaqartitsisartut ilisimaneqarpoq.

Akissut: Innuttaasut inooqatigiinni inissisimaffitsik apeqqutaatinnagu inatsimmut ilaapput.

35) Ilaqutariit tamarmiusut nalilersorneqarnissaat, tarnikkut ilungersunarsisoqartillugu ilaqutaasut aamma ikiorserneqarsinnaaqqullugit – ikiortissarsiornissaminut periarfissaat pillugit eqqortumillu ikiorserneqarnissaannut periarfissaat pillugit qanoq qulakkeerniarneqarpa?

Akissut: Innuttaasut ataasiakkaat pisariaqartitaat pillugit kommunit nalilersuissapput. Tassungaa atattillugu Namminersorlutik Oqartussat kommuninut siunnersuillutillu ilitsersuissapput, taamaalillutik innuttaasunut ataasikkaanut suliniutini ilaqutaasut aamma/imaluunniit attaveqarfisartakkat naleqquttut ilaatinneqassallutik.

Siunnersuisarneq aamma ilitsersuisarneq pillugu inatsisissasut siunnersuummi § 37 aamma innersuussutigineqarpoq.

36) Siunnersuummut tunngatilugu atortuulersitsinissamut qanoq periusissiaqartoqarpa?

Akissut: Apeqqummut 11-imut akissut innersuussutigineqarpoq.

37) Atortuulersitsinissaq qulakkeerniarlugu suut eqaannerusumik pitsaannerusumillu Namminersorlutik Oqartussaniit Innarluutilinnillu Sulissivimmiit kommuninut nukittorsaatigalugillu tapersersorniarneqarpat?

Akissut: : Apeqqummut 36-imut akissut innersuussutigineqarpoq.

Pissassarfiup inissisimanera tassaassasoq kommunit pisariaqartitaanik pisinnaasaq malillugu tapersersuineq inatsimmut ilitsersuutip aamma qulakkiissavaa.

38) Siunnersuutip malitsigisaanik kommunit suliassanik kivitsisinnaanissaannut qanoq qulakkeerinnittoqarniarpa?

Akissut: Apeqqummut 11-imut aamma 37-imut akissut innersuussutigineqarpoq.

39) Siunnersuutip matuma suniutaasa naliliivigineqarnissaat qaqugu qanorlu pinissaa Naalakkersuisut qulakkeerniarpaat.

Akissut: Apeqqummut 33-imut akissut innersuussutigineqarpoq.

40) Siunnersuummi kapitali 1-imi siunertarineqartut allassimasut inunnt innarluutilinnut atugassarititaasunik qulakkeerinninnissaq Naalakkersuisunit qanoq misilittarniarneqarpa?

Akissut: Apeqqummut 33-imut akissut takusiuk.

Qulaani taaneqartut apeqqutinik saqqummersitsippata, imaluunniit ataatsimiititaliap apeqqutaasa itisilernerneqarnissaat ataatsimiititaliap kissaatigippagu, soorunami ataatsimiititaliap ataatsimeeqatiginissaanut ammapunga.

Inussiarnersumik inuulluaqqusillunga



Martha Abelsen